



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ  
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS  
*manè discutienda in Scholis Medicorum, die Jovis decimo-nono  
mensis Novembris, anno Domini M. DCC. L.*

M. LUDOVICO - ALEXANDRO GERVAISE,  
Doctore Medico, Præsides.

*An Fœtus in utero Respiret.*

I.



NA è functionibus vitalibus respiratio, omnibus nota, omnibus necessaria, certissimum vitæ indicium, motus sympatico-mechanicus, alternâ aëris inspiratione, expiratione peragitur; ad tempus cibo potuque carebit animal, aëre diù non carebit impunè. Quanta sit hujus functionis cum cæteris functionibus sympathia, docet admirabilis nervorum intercostalium distributio, cum cæteris visceribus communicatio; quot & quanta vel soli debeat respirationi animalis œconomia, quis ignorat vel à limine Medicus? Hæc succi alimentosi crudioris adhuc & indigesti concoctionem sola perficit, absolvit; nativum totius corporis calorem tum in solidis tum in fluidis præstat, fovet, sustinet: sanguini in præcordiis æstuanti refrigerium affert, ruborem conciliat; motum circulatorium, intestinum, languentem suscitatur,

A



erigit, adjuvat. At quanta miseris immineant mortalibus mala, si laxa nimis aut rigida fuerit pulmonum substantia, si læsa, aucta, imminuta, languida fuerit respiratio, docet innumera morborum cohors, tusses, astmata, gravedines, peripneumoniæ, docet, eheu, Phtisicorum miseranda conditio. Functione ad vitam adeò necessariâ fœtum impunè defraudari, quis crediderit? Multi asserunt, negant multi; quæstio diù agitata, controversa: respirare fœtum in utero, vetus error, ferè inter saniores obsolevit; hunc suis adhuc patronis non carentem persequitur ratio, profligat anatome, certis & inconcussis innixa principiis diruit, evertit Physiologia.

## I I.

**R**ESPIRATIONI famulantur organa, externa, interna, diversæ molis & figuræ, usûs diversi; præcipuas obtinet vices pulmo, viscus illud ingens, amplum, molle, vasculosum, cellulare, vasis sanguineis, aëreis conflatum. Hunc ambit, protegit membrana ingens plevra, rore copioso lymphatico madens, ab anteriori vertebrarum parte in anteriorem & paulò lævam sterni superficiem septum efformans, mox in se rediens, duplicem hinc & indè lobum proximè involvit. Viscus illud tam pretiosum, tam nobile, recipit thecâ ossea, mobilis, elastica, duodeno costarum arcuatarum ordine utrimque obvallata, duodenis dorso vertebrae posticè defensa, sterno anticè, superius claviculis duabus, subclaviis aliisque colli musculis conclusa, diaphragmate inferius. At quid ille tot organorum apparatus? Quid elegantissima sine aëre, pulmonum fabrica? Sublato aëre, corrumpitur vitæ respirationisque systema. Qanta sit inter respirandum fluidi huius potentia, necessitas, probant experimenta Boilæana. Naturam ignorat, qui nescit aëris proprietates. (a) *Aër instrumentum catholicum, necessarium, efficacissimum quo imprimis universa Natura utitur in omnibus ferè suis operibus; fruimur illo & vescimur assiduo; hunc qualiscumque demùm fuerit, vita ratio & necessitas cogunt ut inspiremus expiremusque, usque adeò ut omnia artis auxilia frustra sint, juvet nihil naturæ omne presidium homines aëre carentes.* Duplex itaque respirationis motus, inspiratorius, expiratorius; aliâ inspirationis, aliâ expirationis instrumenta. Musculi subclaviales, ferrati, intercostales, diaphragma, sua inspirationi pensa persolvunt, contrahuntur, accurtantur, thoracem elevant, ampliant, dilatant; aër partim proprio pondere, propriâ elasticitate, partim thoracis ampliatione, dilatatione pressus, determinatur in fauces & laryngem, pulmonum subit anfractus, textum inflat vesicularem, vasa sanguinea explicat, sanguini transitum aperit, sanguinem comprimit, explicatis vesiculis sanguis ubique vasorum contactu motus, pressus, coarctatus, intimiùs permiscetur, perfectiùs elaboratur; hinc subjectos obices faciliùs superat, faciliùs celeriùsque in venam & arteriam pulmonalem traducitur: sed contracti fatiscunt musculi costarum elasticitati vix jam resistentes, frustra quoque reluctantes; fatiscunt vasa sanguinea, aërea, explicata, ampliata, distenta; fatiscit motus sanguinis circulatorius, intestinus, hinc expirationis necessitas: suas vices implent musculi abdominales, contrahuntur, thoracem deprimunt, minuitur interna aëris pressio, augetur externa, comprimuntur arteriæ, venæ, vesiculæ; aër inspiratus pellitur, congestus sanguis exprimitur; hinc fluidior, rubicundior, calidior, claustra perrumpit cardiaca, suosque motus feliciùs absolvit; hinc denique vocis, tussis, cantûs, oscitationis aliaque quàm plurima pendent respirationis phænomena.

## I I I.

**D**IVERSA in diversis natura, in operibus suis compendiosa, in omnibus bona, sagax, & provida, animalium genera, species, sexus, ætates distinxit; fœtum aliter, aliter vivere & crescere iussit adultum. Patet ratio: non eadem utrique facultas, non eadem necessitas: quis neget? Ubi desunt organa, ubi nullum aëris commercium. Generationis doctrinam evolventi, tempora legesque gestationis consideranti, solvitur nodus. Benefici & fœcundantis spiritûs halitus recreatus dif-

(a) Boerha.  
Elem. Chym.  
p. 127. de  
aëre.



tenditur sensim & explicatur ovulus, crescunt & expanduntur vascula, membranulæ tenerioribus inhærentes radiculis. Tunc primum apparent vix oculis inarmatis sensibilia embrionis rudimenta; brevi massa grandior angustioris caliculi respuit hospitium, dehiscit membranula ovulum continens, distrahuntur magis ac magis radiculæ, gemunt sub pondere: occupant fimbriæ limina servantes, arrectæ signum expectant, pretiosum onus quasi digitis amplectuntur, altè excipiunt, uteroque reddunt, suo sinu servandum, calore fovendum, lymphâ nutriendum. Hic loci amplioris nutrimentique captus uberioris dulcedine, datis acceptisque vasculorum radicibus, retinetur novus hospes; omnia hujus saluti & incremento invigilant: \* aëris externi clauduntur aditus. Crescunt & ampliantur placentæ vasa, membranæ, Chorion, amnios; affluit undiquè liquor tenax, albicans, limpidissimus, suis è fonticulis scaturiens, homoncionem videas jam conspicuum, umbilico suspensum, fluido immersum: uniuntur fibrillæ liquori innatantes, aliæ aliis applicantur, conglutinantur; ossa, muscoli, involucra, venarum & arteriarum propagines sensim ac diverso ordine compaginantur, firmantur. Sua sunt singulis diebus incrementa ex observationibus Malpighianis annotanda, nec rumpenda prius carceris repagula, quam elaborata fuerint sufficienter organa, quam firma satis suisque functionibus adimplendis idonea, opus novem mensium spatium absolvendum.

(\*) Boerhaav. Institut. n°. 675. Ovum imprægnatum clauso jam stricturâ suorum musculorum utero continetur, simul juga membranosa in cervice uteri posita os ejus magis obturant atque descendunt ab ingressu peregrinorum, quin & lentus tenaxque succus vesiculis rotundis ibi positis paratus atque ferè concretus in speciem pastæ amylaceæ, &c.

It. Théod. Craan, œconom. anim. vel de exort. homin. quæst. 24. p. 292.

## I V.

**N**ON necessaria nec possibilis fœtus in utero conclusi respiratio; non quærenda datæ respirationis beneficia, vel negatæ timenda sunt incommoda. Beneficus uteri calor tenellulos homoncionis artus occupat, motus solidorum fluidorumque à matre in fœtum communicatur, vasorum continuitate propagatur, molli & intimo parietum ambientium contactu & ut ita dicam amplexu fovetur & augeatur: lympham suppeditant innumeri fere arteriolarum penicilli singulis uteri punctis inhiantes, in vasa umbilicalia coeuntes, lympham quâ toto corpore nulla elaboratior, nulla perfectior, nulla delicatioribus fibrillarum staminibus compaginandis, nutriendisque apta magis & idonea. Tam benigno latice repletur amnios, fœtus perfunditur, totaque molliusculi corporis substantia penetratur, alluitur, alitur; hinc portentosum illud quod gestationis tempore observatur incrementum. An verò circulationis minaris impedimenta, si sanguini intra pulmones negatur aditus; an æstus & incendium, si suo refrigerio, aëre nempe externo defraudantur præcordia? Quiesce, metum compeſce; omnia prævisa. Nec moram circulationi, nec incendium præcordiis, hic affert respirationis defectus: adsunt arteriæ umbilicales, sanguinem ex iliaticis in placentam reportantes; circulationi auxiliantur canalis venosus, arteriosus, foramen ovale; canalis venosus sanguinem à sinu portarum in auriculam dextram rectâ advehit; hic partim dextro redditur ventriculo, partim datâ per foramen licentiâ, uno saltu in auriculam sinistram, novæ circulationi propior exilit. Ex ventriculo dextro in truncum arteriæ pulmonalis pellitur, negatâ per pulmones viâ novum iter aperit canalis arteriosus, rejectum à pulmonibus sanguinem excipit, in aortam exonerat. Quid ergo hic refrigerium? Quiescente pulmone minor est attritus, minor in sanguinem pressio, nec ea vis est debilioribus adhuc fœtus vasculis, visceribus, quam ut eorum motu placidus & relentescent adeo sanguis incalescat. Uno verbo (a) nulla atmosphære pressio internâ pressione æquilibranda, nec si adsit ambiens atmosphæra, nec si peragenda respiratio, valerent assequi mol-

(a) Frid. Hoffman Med. ration. Tom. I. Part. 2. c. 23. sect. 12. p. 434.



liora indigestaque diffluentis fœtus organa, pulmo, plevra, ossa, musculi inspiratorii, expiratorii, imò validiorem sanguinis motum vix ferrent venæ, vix arteriæ.

## V.

(a) Physiol.  
Med. Part. 2.  
cap. 2. p. 481.

**Q**UOMINUS fœtum in utero respirare credamus inquit (b) Gotofr. Bergerus, anomalus situs & figura instrumentorum, nullum adhuc usum spirantium ventant: in eo diaphragma adeo est reductum & fornicatum ut numquam magis, &c. Nec desunt experimenta; unum aut alterum proferre liceat; antliæ pneumaticæ subji-  
ciantur fœtus pulmones, extracto aëre non intumescunt. Aquæ injecti, lapidis instar, fundum petunt, certissima deficientis aëris argumenta. Valeant ergò ultimæ ad-  
versariorum objectiones, valeant decantata suctio, vagitus uterinus. Quid hîc su-  
ctionis opus? Sola sufficit deglutitio. Lymphæ amnii fœtus innatans, nutritium  
laticem toto corpore imbibit, ore ptæsertim deglutit: quid verò ad deglutitionem  
respiratio? Nonne sola linguæ musculorumque pharyngis requiritur actio? Imò  
decipit incautos crustula in laryngem devia, aëre inter deglutiendum malè inspi-  
rato: dulcia potatoris perturbat gaudia vinum in patulas fauces refluens, dum im-  
portunâ expiratione vias sibi non permissas nec impunè tentandas aggreditur. De  
fœtus vagitu sic Drelincurtius: (c) Aëris in utero nescius est fœtus, aërem igitur sibi  
ignotum exposcit nusquam, ejus namque pulmones otiantur, ratione saltem muneris aërei,  
atque adeo vagitûs uterini membranis illæsis, nec proruptis aquis delirantium vetula-  
rum mihi dulcia sunt somnia, &c. Errarunt, inquit Ilbrand. de Diemerbroëc, (d)  
quotquot de infantis respiratione & vagitu in utero scripserunt; 1<sup>o</sup>. enim historiæ de  
hâc re notatæ pleraque descriptæ sunt ex relatu muliercularum, aliorumque imperito-  
rum hominum qui sibi-ipsis has nugas imaginantur, aut studio aliis hujusmodi falla-  
cias persuadent. 2<sup>o</sup>. Certum est neque respirationem, neque vagitum in utero sine aëre  
illic præsentem fieri posse, sed per quas, quæso, vias aër eò penetrabit? Nihil aliud  
reverà tales unquam fuere vagitus aut ploratus in utero, quàm borborygmi & un-  
dulationes à calcitracione, diversisque fœtus grandiusculi motitationibus concitatæ.  
Sed unum de multis audiamus Anton. Deusingium; (e) Novi, ait, Medicum non  
ineptè referentem se fœtus vagitum aut ploratum in utero conjugis audivisse, cum in-  
terim uxor nequidem gravida esset, ut eventus docuit. Quid plura? Conclamant tot  
præstantissimorum Medicorum observationes, testimonia, annuit ratio, lucet un-  
dique veritas, patet conclusio.

(b) De con-  
cep. perioch.  
§ 5. P. M. 133.  
sq.

(c) Anatom.  
lib. 1. c. 25.  
fol. M. 236.

(d) Traſtat.  
de fœtu Mul-  
ſpont. ſect.  
2. P. M. 85.

Ergò Fœtus in utero non respirat.

## DOMINI DOCTORES DISPUTATURI.

M. Jacobus-Laurentius Mauroy.  
M. Natalis-Andreas-Joannes-  
Baptista Chesneau.

M. Dionysius-Claudius Doulcet.  
M. Bartholomæus-Tuffanus le  
Clerc, Medicus Regis ordina-  
rius.

M. Franciscus-Felicitas Cochus  
M. Joannes de Dieft.

M. Joannes-Franciscus Paris.

M. Ludovicus-Gabriel Dupré.

M. Josephus de Jussieu, Regia  
Scientiarum Academia So-  
cius.

Proponebat Parisiis, PETRUS AGÁÉSSE, Parisinus, Saluberrimæ Fa-  
cultatis Medicinæ Parisiensis Baccalaureus, A. R. S. H. 1750,

A SEXTA AD MERIDIEM.

Typis QUILLAU, Universitatis & Facultatis Medicinæ Typographi, 1750.